

錢文敏公全集

茶山文集序

爲今之人而子子然號於衆曰吾將爲古之文庸耶妄耶庸者貌古妄者作古其文奚古之能若然君子卒不病其庸且妄而亦曰吾將爲古之文則又何說曰此其道如傳語然鄉里之子欲適城市者自苦其詘誦喁嘶不得與通也必求學爲城市語焉推之自邑而郡自郡而會而都莫不如是何則所學益通所傳益廣古文之學寧獨不然易曰其旨遠其辭文論語曰辭達而已矣春秋傳曰言之無文行之不遠皆其說也難者曰爲古之文而切繹引擻惟古是縛將轉益其庸而弊之流井不以爲妄曰否否文之真古者言古人之所言不爲因

言古人之所不言不爲創昔之論文者其說河漢無極
大端識領要者不越積理養氣概之要之是功用之說
殆無易乎傳語者也難者進曰典謨雅頌遠矣文矣達
矣顧曷以處夫周誥殷盤之聲牙佶屈者乎曰政方言
之兼收于古訓中者夫以賢傳翼聖經什常有五之譌
而以文言臚俗事百必無一之失昔樊紹述之文艱澁
不可句讀而昌黎以爲文從字順各識職孫可之辨史
法亦有直事俚言特紀前人一時語以立實錄非謂俚
言奇健能爲史筆精魄云云譬若都會郡邑中有專采
鄉里語以愈著其遠且文文且達者所爭在真古不真
古耳於傳語之義何傷少司寇茶山錢公心知爲古文

之道其文不肯一字蹈襲古人而字字能見古人情狀
集中推闡陰陽氣化如雷電諸篇旣已孤詣絕人卽旁
及表章節烈扶樹名教之作竝多得之自治秋官讞牘
中文覈而體嚴聲淵然如發金石匪特懸之都會有口
能頌雖登清廟明堂何忝哉緣屬余導言辭不獲命姑
操土音相與詁誦啁哖之抑不知量之甚也時乾隆庚
寅孟春月下澣繩菴居士劉綸拜序

茶山文鈔目次

卷之一

奏疏十三首

卷之二

奏疏七首

卷之三

序十三首

卷之四

序二十首

卷之五

記十六首

卷之六

記十三首

卷之七

論說十八首

卷之八

論說十七首

卷之九

書十二首

卷之十

書後二十首

卷之十一

傳十一首

卷之十二

行狀碑誌六首

茶山文鈔卷之一

武進錢維城稼軒著 弟

姪

子中銑 中鈺

奏疏一

申明律例摺

爲請申律例之明文以昭畫一事竊惟刑章不厭叅求而引斷期於允當

國家成憲載在律例全書者本極詳明賅備顧有原文本無岐悞而援引不免叅差臣蒙

天恩簡貳刑官凡遇讞牘互異之處悉意研求隨時商

同駁正但其中一二條岐悞頗多似宜亟爲申明庶內
外各有遵循茲當遠離

闕下之時敬就管窺所及爲我

皇上縷晰陳之

一棄屍之律宜歸本條也查律載殘毀他人死屍及棄
屍水中者杖一百流三千里其棄而不失者減一等此
係發塚本條註云屍謂在家在野未殯葬者若已殯葬
則以開棺見屍論以殘棄常人未埋之屍與發掘墳塚
者有間故以次遞減罪止流徒皆蒙上文發塚見屍而
言也乃各省謀故鬪毆命案遇有棄屍滅跡之事輒援
此律聲明棄屍輕罪弗論一語據爲成例寔悞以毀棄

常人之死屍例諸殺命棄屍之重辟固與律意不符然
尙無關罪名出入若有登時殺死姦夫或格殺持杖拒
捕之罪人臨時殺死竊刼之盜賊間有愚民畏累將屍
移埋棄水者問刑有司因其本罪原應弗論遂專治其
移埋棄屍之罪臣伏思此等人犯所殺者原係罪人故
寬其擅殺之罪乃殺死罪人律得弗論而移棄此勿論
之屍罪反流徒是爲本小末大祇因命案棄屍相沿引
用遂致牽濶不明應請嗣後一切命案卽有棄屍餘罪
不得援引此律其殺死姦盜等項棄屍水中如果情真
事確者一並依律弗論庶輕重不致失倫

一親屬捉姦非登時殺死姦夫之例宜按律引用也查

例載本夫有服親屬皆許捉姦如登時殺死姦夫姦婦者並依夜無故入人家已就拘執而擅殺科罪若非登時以鬪殺論例於親屬殺姦分別登時非登時皆照本夫加一等定罪各指姦夫未曾拒捕格鬪而言也若一有拒捕格鬪則毋論本夫與親屬皆當依罪人拒捕論然則例所云親屬捉姦非登時殺死以鬪殺論者正引罪人不拒捕而擅殺以鬪殺論之律文義甚明乃各省問擬有援擅殺論者有直以鬪殺論者雖鬪殺之與不拒捕而殺同一擬抵而情罪判然甚至持杖拒捕之姦夫反以謀故鬪毆分別擬議是殺拒捕之姦反重於不拒捕之姦尤爲舛錯蓋姦夫與竊盜俱屬有罪之人故

殺姦與殺盜罪適相等其輕重俱在拒捕不拒捕之分
稱情準法豈容互異應請將親屬殺姦非係登時者悉
據罪人不拒捕而擅殺之律以關殺論定擬其有拒捕
一依罪人拒捕格殺之律科斷庶秋讞俱歸畫一矣
以上二條臣因各省辦理不齊屢經駁飭未能畫一徒
致案牘紛繁伏祈

皇上敕下九卿詳悉核議如或臣言可採卽移付律例
館通行直省一體遵行爲此具摺謹

奏

浙江學政到任摺

爲奏

聞事竊臣荷蒙

皇上天恩督學兩浙并蒙

聖慈給假便道省親臣父母及舉家感激

鴻恩俱北向叩首頂戴茲已於十一月初十日到任受
事隨具本恭報在案現今行文各屬將於明春先赴寧
波紹興一帶舉行歲考臣仰遵

聖訓留心覺察隨時整頓竊見浙省士子大都見小者
頗多往往以山田樹木租息等項動輒構訟甚而兄弟
叔姪訐訟不休現赴臣衙門具控者不一而足臣一面
嚴加訓誨飭令地方官上緊勘丈審斷無任延案仍大
張告示恭述

皇上訓迪士林敦崇禮讓至意勸令安靜讀書各圖上進并嚴拿代寫詞訟把持衙門之劣生以肅學校再查浙省文風素優但畱意辭章者固不乏人而根柢之學講者絕少士子大抵止治一經本經之外率多不讀浙東爲尤甚竊思五經與四子均爲士子根本急宜講誦現在嚴飭諸生除本經外限以每半年補讀一經責成各學教官按季造冊加結送臣查核并令於考試卷面註明治某經兼熟某經字樣臣於考試時按名抽背或令默書至月課乃教官端責向來視爲具文諸生有終年不作文不見教官者殊非教學之道臣現在飭令各學按期按名務令入課卽令該教官詳悉加批按月彙

解臣署既可以考諸生文藝之優劣兼以驗教官評隲之當否以爲殿最俟開考一二棚後另將情形具奏外合先奏

聞再浙省今年秋初偶被風潮杭嘉等府間有被災之處秋冬之間天氣晴和民間收場得便目下商販流通米糧價值俱屬平減本月十五十九二十三等日連有雨澤麥苗蔬菜普得霑潤二十七八兩日得雪數寸來歲可望豐登恐塵

聖懷合并奏

聞伏祈

睿鑒謹

奏

請刪考試科條摺

爲請刪無益之科條以收實效事乾隆二十八年十一月二十日臣接奉部文開載福建學政紀昀條奏內有令生童悉照科場新例于卷後自書添註塗抹一條經部議覆准行在案在部臣以該學政意在剔弊不厭詳慎然臣考試經年竊見此條不必行亦實在難行且行之不惟無益而反多窒礙之處不敢以甫經議准默默不言謹爲我

皇上陳之查科場之所以令士子自書添註塗抹者以卷經謄錄恐有竄收法至周也今生童試卷皆隨交隨

收並無謄錄教官收卷時學臣在堂眼同收取且生童環列左右勢難當面作弊或者疑及內幕特卽教官以爲言不知內幕惟當擇才品兼優相知有素者爲之而又時加精察若步步設疑而求助于法則法不足恃而弊轉滋夫彼果敢于增損生童之文又何不可并其填註之數而增損之且又安保其不以填註之數爲關通之數此其不足防弊不必行一也又科場時日甚寬諸生旣可以細細更改亦可以細細查數填註生童考試朝入暮出例不給燭若在秋冬日短尤覺倉皇臣閱其情形頗爲竭蹶在早交者尙可令其查註而至傍晚投交之卷本人雖欲覆看一遍尙多不及焉能復令查註

統計一棚之卷早交者十之二三晚交者十之六七此其難行者一也臣又見浙省爲文風較優之地然進卷之外絕少佳卷爾餘大都僅僅足額而已今悉令其自行查註其頭二牌交卷者力能爲之其遲交之卷勢有不能不能便不合式是合式者常少而不合式者常多也且早交者多草率之卷其佳卷多在遲交之中是劣卷常合式而佳卷常不合式也今拘此無關弊竇之事而反置佳卷于不閱既懼屈抑真才復于合式之中濫取足額亦徒開倣倖至于生員若以違式不註者概置下等尤難辦理此其無益而窒礙者一也以上情節臣就浙省現在考試情形實多不便不揣冒昧據實竇陳

伏乞

皇上聖明睿鑒

敕部議覆施行謹

奏

謝

賜紫光閣墨刻摺

爲恭謝

天恩事乾隆二十八年十一月二十一日浙省差弁回

賁捧

恩賜紫光閣墨刻一分三十三張到臣隨恭設香案

望

闕叩頭祇受訖伏惟

皇上舜琴譜化軒鏡明威恢二萬里式廓之收章自我
天覆昭千億載無前之偉畧有此武功開麟閣以圖勲
摘龍文而紀績輦飛結就曾叨

錫宴之榮鳳翥摩成更沐

賜書之賁春來太液遙通明聖湖邊

恩重超臺廻望蓬萊頂上銘衷曷旣泐感靡涯所有微
臣感激下情理合繕摺恭謝

天恩謹

奏

謝

賜經書摺

爲恭謝

天恩事乾隆二十九年六月初九日浙省提塘官楊寶
賁到

恩賜

御製繙譯書經一部

御纂春秋直解一部到

臣臣

隨恭設香案叩頭祇領訖

欽惟我

皇上居正體元建中錫極肅父哲謀統乎聖心涵洛水
之疇惇庸命討協于天神契尼山之筆勤

睿思之研悅當

幾暇以丹黃會意諧聲合四代之編普著同文之盛鈎
元纂要自三傳而下盡刪曲說之非榮分奎璧之光捧
獲琳瑯之寶臣學慚墨守職在颺言際時雍風動之休
識

皇猷之被四表求比事屬辭之旨仰

聖學之集大成庶奉瑞函竭蠡窺于夙夜敢因

寵錫廣鴻化于東南爲此繕摺恭謝

天恩謹

奏

請

頒經書摺

爲推揚

聖教以廣甄陶事本年六月初九日蒙

恩賜

御製繙譯書經一部

御纂春秋直解一部到

臣

除叩頭祇領另摺恭謝外伏

惟

皇上以二帝三王之心爲心以二帝三王之道爲道

聖以闡聖言如口出斯固在廷諸臣所不能參況

臣粗

曉繙譯何以仰窺萬一至春秋一經義例愈紛經旨愈

晦昔至聖以天自處故有筆有削一如化工付物

皇上心卽天心故獨契乎筆削之源言簡義該羣儒喩

息誠所謂游夏之徒一辭莫贊者矣臣伏念五經如日月經天雖庸耳俗目光華共仰若其微言與旨卽老師宿儒未必盡通自

聖祖仁皇帝

御纂周易折衷

世宗憲皇帝

欽定書詩春秋三經傳說我

皇上御纂三禮義疏

頒賜學宮士子皆得涵泳

聖涯沐浴醇化誠重熙累洽文治昌明之極軌也臣以

非材司鐸兩浙凡按試之始於諸經

御案內敬謹摘錄數條令諸士子默對雖未盡闡揚精蘊而記誦無悞旁通儒說者亦所在多有此皆

皇上作君作師嘉與諸生開其聾瞶而諸生咸知踴躍爭自濯磨伏讀乾隆五年

聖訓諄諄勉多士以經術爲文章由此駸駸或庶幾焉
臣愚伏念繙釋爲諸生所未曉而春秋乃士子所必讀
御纂直解宜照

御纂三禮義疏之例發與直省督撫敬謹翻刻分貯學宮俾士子以時誦習再恭讀

御製序文內尙有易詩二經亦請一併

恩賜頒發庶經學益明

聖化益廣矣

臣

不勝至願冒昧陳請伏祈

聖慈訓示遵行謹

奏

謝

賜御製文集摺

爲恭謝

天恩事本月初九日浙省提塘官楊寶賁捧

恩賜

御製文初集二函到

臣臣

隨恭設香案叩頭祇領訖欽

惟我

皇上治闡文思學通道奧備體裁于典謨訓誥聲振觀

其大成發章采于日月星辰德業流其富有龍飛利見
早覩法象之端倪鳳叶和聲疊譜元音之鐘呂及乎
萬幾偶暇

乙夜彌勤方矩圓規隨形畢肖天經地緯衆有兼包先
訂定于廿八年以前已累積乎五百篇而外爰

鑒從臣之敦請始蒙

俞旨而開雕猥以香案舊班特荷瑤函下賁盥來薇露
護以芸香頂禮傾心廻環維誦猶憶夙承

朶殿墨花之脫藁如神于今永繹

鴻文理窟之覃思莫罄格

天述

祖揚景命于無疆掖

輦稱觴抒孝思于不匱論成獨斷朗若發蒙碑紀豐功
晏然坐定兼收華實品彙悉涵于太和旁涉教觀言詮
亦證于無上而且傳宣喉舌全刪臺閣之詞記注

起居未載絲綸之語美矣備矣陋徇齊敦敏之目猶朴
邀而無華堂哉皇哉超畫卦結繩以還獨神奇之創獲
臣窺天惟管學海無源賡拜自慚妙闕淵雲之墨文明
親覩贊窮游夏之辭太史昌黎趨步曾邀

聖訓吳山越水馳驅易塞達心任排纂以無功仍蒙
肇錫附名銜于不朽還企續編從此播厥音徽示昭回
于南國奉爲圭臬策羈靡之下材沾溉無涯欽承倍切

式珍藝府丕煥

皇猷爲此繕摺恭謝

天恩謹

奏

謝免漕糧摺

爲恭謝

天恩事乾隆三十年正月初二日奉

上諭蠲免江南漕糧

臣

恭遇

溫綸曷勝感抃欽惟我

皇上豫徵順動謙酌平施隆休助之成規宵旰更求于
民隱妙權衡于善策科條益載以惠心當

清蹕之未臨早

恩綸之是渙在屢豐之歲總結固急于奉公而三易之區葢藏或儉于備預前此奉行畫一拘常格而厚薄之差數未明今茲

指授縷分絜下情而新舊之積逋盡豁合上下江之數總二百萬之多拜

恩先切于近光行慶益酬其望

幸

臣

誼慚任卹情切枌榆歌耕鑿于江鄉未附康衢之

父老聽風聲于使節喜迎化日之旌旄飽德難名共矢奉揚于夙夜施行有術倍欽調劑于神明爲此繕摺恭謝

天恩謹

奏

謝

恩賜詩摺

爲恭謝

天恩事本月初八日蒙

恩賜

御製五言律詩一章

臣

當在

宮門叩頭祇領訖竊

臣

拆襍短才負蚊微力班趨

禁直時贈

幾暇揮毫風採名區適遇

時巡展義迓

鸞旌于道左方酬三載之思降

奎藻于雲端更荷五言之訓

恩綸親切教思殷勤論文還淳古之風課業尙紛綸之
學瞻此湖山毓秀久沾

聖治之光華慚茲銜尺掄才敢負冰衷之兢愼榮分扈
蹕祕闕仍登遇彼巋歌卷阿幸附隔歲

寵頒經義更欽載道之文旨春

華錫宸編血仰挾天之製捧來

行殿肅承而警若箴銘鎮作家珍永守而奉爲楷則矣

所有微臣感激下忱謹繕摺恭謝

天恩謹

奏

請廣刊

御製詩文摺

爲恭請廣刊

御製詩文以式士林事仰惟我

皇上聖學高深天文彪炳

萬幾餘暇製作日新

臨御以來

御製詩初集二集計及萬篇

御製文初集逾五百餘首俱經刊刻內外臣工與選

恩賜者皆得瞻雲漢之章奉爲模楷而多士志切觀光每以未得盡讀

鴻文家藏

寶笈昂首拭目有懷莫紓以臣所見江浙如此推之薄海上林囁囁向化諒有同情可否仰懇

天恩救發

御製詩初集二集

御製文初集各一部交直省布政司照

頒發經書之例一體刊行俾遐陬僻澨共仰

奎光戶誦家弦福薰雅化

臣

愚不勝至願謹繕摺恭

奏伏祈

皇上睿鑒施行謹

奏

請增定學政條例摺

爲敬抒管見仰祈

睿鑒事竊

臣蒙

恩視學浙省一切遵照學政全書悉心辦理竊見全書所載科條具備周匝無遺惟有一二事似應酌定者謹爲我

皇上陳之

一新舊貢監執照宜畫一以杜頂冒也查貢監一途賢愚混雜最易滋弊惟執照詳載履歷藉以稽查而遠年

執照若工部水利及營田等例皆無年貌三代且有並
無部照止有實收者竊思貢監全憑執照若無年貌三
代何人不可假借甚至有康熙四五年執照尙持赴
考者臣一一細加詰問據云係一二歲時所捐究難憑
信請

敕部通行直省凡有遠年執照無年貌三代者限文到
一年內自行呈繳各州縣分季彙齊呈送學臣學
臣亦分季彙咨禮部換與執照仍各分給如一年之後
有不行呈換者卽不准作貢監似此冒濫可除亦無紛
擾

一生員加納貢監驗照開除宜有定限也查生員加納

貢監卽應將執照呈送學臣將學冊內開除於歲科試
畢後造冊報部乃近來諸生多有不行呈驗致雖經加
捐而本身廩附又以積欠三考斥革者臣於科試時見
有此等若不准作監則現有部照若准其應試則業已
咨部斥革有案礙難辦理現在停其鄉試總於科報時
咨部另辦并請嗣後以領到部照半年爲限速將部照
呈驗開除如有違逾半年以上者發學戒飭一年以上
者卽將加捐之處註銷

一遊幕欠考生員宜准其就便加捐也浙省生員作幕
外省者甚多而杭嘉紹三府爲尤甚查生員呈告遊學
者欠歲考一二次尙准其展限補考如積欠三次卽予

斥革不許展限定例甚嚴本防其遊蕩廢業滋生事端也查生員作幕外地雖因貧餬口亦屬辦公邇來惡幕勾連種種積弊

皇上聖明洞鑒嚴加懲治羣知儆惕此等積欠多考者尙屬多年歷練主賓相信之人驟易生手實多未便故有屢次嚴催始行回籍仍投文守取考畢卽行者該生等近或數百里遠或數千里奔馳往返累月經年不過作文二篇附以三等於考課之道毫無實濟而或反誤公仰懇

聖恩俯念此等皆非蕩廢准予就本幕衙門起文赴各藩庫加捐貢監其銀隨餉搭解歸部仍各自呈明欠一

二考者廩生照增增生照附附生照俊秀欠三考者不論廩增附均照俊秀加捐免其補考一面行咨戶禮二部及本省學政如有隱匿次數者將所捐注銷若慮各省報捐人多或致在部報捐者少卽令仍歸戶部但思此種報捐本爲就便而因欠考降等加捐仍有核實之道必無冒濫其數亦不多也

一生監侵牟惡習宜勒石嚴禁也查浙省各寺廟均有生監主持名爲檀越一切田地山場視同世業考其所自皆云祖先創建或加鼎新或捐田在寺其源流大都遠在魏晉唐宋或據誌書或據家譜皆渺茫不足憑而一寺或一姓或三四姓不等總以寺產之多寡爲多寡

其中此爭彼奪無歲無之無郡不有臣在浙三年不下
十數案經歷數年不能完結皆由彼此各有私據卽經
斷結更換一官必又翻控其中牽連生監自數人至十
數人不等下結上翻滋累殊甚竊思祖宗卽有創助豈
容子孫永作衣食尤可笑者捐數十畝卽合寺之田皆
歸掌握而其事又甚荒遠難稽嗜利紛爭最爲惡習應
請

旨飭部通行示禁無論有憑無憑年遠年近所有擅越
一概革除勅石寺門永遠遵守此條雖無關考試亦端
士習清訟源之一端也

以上四條謹就愚昧之見敬陳一得是否可採伏乞

皇上睿鑒

敕部議覆施行謹

奏

申明事主捕賊本例摺

爲請申明事主捕賊本例以杜誤引事竊惟賊盜居刑律之首治之極嚴我

皇上愛養閭閻于弭盜安良尤爲周至近以積匪猾賊改發新疆又

敕令各省獲賊之案分別功過按年彙題誠欲使內地務絕根株有司加意督緝法至善也竊思治賊捕賊在官之法各有專條而民間捕賊總以夜無故入人家一

條該之序於賊盜下卷之末別無岐二伏讀乾隆七年
欽定夜無故入人家例文曰凡黑夜偷竊或白日入人
家內竊取財物事主毆打至死者比照夜無故入人家
已就拘執而擅殺杖徒細繹例義黑夜偷竊是夜而不
入人家者白日入人家內竊取財物是入人家而非夜
者於律文各得其半故爲區別不分登時及拘執總照
已就拘執杖徒正與竊盜臨時有拒捕不分殺傷與否
皆斬文義相對其止於杖徒者以鬥毆律自笞杖以至
折傷杖流至死者絞事主毆賊折傷以下皆勿論故雖
至死杖徒亦以賊盜不得與良民論抵寬良民所以嚴
賊盜也猶恐引用失當復申之曰若止在曠野白日摘

取蔬果等類不得濫引此律則苟非曠野白日摘取蔬果不得濫引他律尤爲明顯周匝而外省問刑衙門于事主殺賊往往有用捕亡律比照罪人不拒捕擅殺論抵者推原其故因律載竊賊臨時有拒捕及殺傷人者皆斬若棄財逃走事主追逐執持金刃拒傷事主者自依罪人拒捕科斷等語竊盜旣用罪人拒捕律事主殺賊卽用罪人不拒捕律似乎一反一正比例未爲不合然查竊盜拒捕止就竊盜而言未嘗言及事主故曰自依言賊盜自依此耳蓋以棄財尙知畏懼與臨時拒捕不同故從寬至折傷方絞此於應死之竊盜求一綫可生之路也今以原竊盜者轉而苛事主已非律意况徧

攷律例必律例所無方比照他律且旣用比照必將比照某律之處於本律聲明事主殺賊旣有夜無故入人家本律又有黑夜偷竊本例並非律例所無本條亦並無應比照罪人不拒捕之文則不得意爲牽引可知臣悉心參校其中實多不可假借之處如官司勾攝人犯責在拘拿不拒捕卽不難拘拿而毆打至死必有挾差逞兇索詐教供情弊故從不拒捕科罪事主毆賊勢在自救未嘗責以拘拿惟已就拘執卽應送官不應擅殺故從已就拘執科罪各有等差又竊盜棄財拒捕與護贓有間故稍從寬宥今因竊盜拒捕分棄財不棄財事主殺賊亦分棄財不棄財夫棄財與否竊盜自知之事

主無檢點家財再行捕賊之理又罪人拒捕言持仗者以官司勾攝人犯凡戶婚田土之案牌票有名者皆是不必盡是克頑故必持仗方爲拒捕方許格殺勿論事主殺賊不分竊盜持仗與否者以賊盜必係克強事主每多良善竊盜之手足已勝于事主之他物今以手足拒毆之竊盜事主毆死仍以不拒捕論抵非鋤強扶弱之義詳查舊案康熙五十一年直隸陳奇琅毆死褚氏等一案始比照罪人不拒捕律擬絞蓋以褚氏等皆係女流且止白日摘取苜蓿並非真正竊盜故不以事主殺賊論嗣後偶或引用失錯必加駁正載在成案歷歷可稽但日久相沿引用漸濫若非一一聲明恐致牽濶

請於賊盜事主本律下各加添註以歸畫一再賊盜固應嚴治而民命亦不可輕其非當場現獲或事隔多日自行訪拿或已加捆縛恣意毒毆或非刑弔拷因而致死者俱依白日曠野摘取蔬果之例比照罪人已就拘執而擅殺者絞明載例文以便遵守愚昧之見是否有當伏乞

皇上聖明睿鑒

敕下大學士九卿詳議施行謹

奏

請嚴出關口票摺

爲請嚴口票以杜拐賣事

臣

部審理王三拐賣幼孩一

案所拐至五十餘人其時必秋冬其地皆東三省據供若賣在近地鄰省易於發覺惟東省人於秋冬來京者多買得出關無從覺察是以積久數多不卽破案臣愚竊思關口出入例有口票原載明人口名數以備稽查請嗣後責成山海關副都統及各隘口嚴加查核出入人數務與票載相符其東省人來京置買奴婢皆令當官立契係旗人歸該管佐領係民人歸太興宛平縣查無來歷不明之弊回明該都統府尹於口票上添載所買姓名年歲鈐蓋印信仍給本人各關口查驗放行亦不得借此稽留需索若票上無名卽行扣留咨部查辦訊有拐買情弊按律治罪卽審無情弊出賣承買之人

均以違

制律問擬如關口疎漏別經發覺亦查明該管官交部
議處似此嚴加查察拐賣之事似可漸除臣愚昧之見
是否有當伏乞

皇上睿鑒

敕議施行謹

奏

茶山文鈔卷之二

武進錢維城稼軒著

弟維屏

維喬編次

姪

鉞

伯垌致純

校字

子中銑

中鉞

奏疏二

古州奏摺一

爲奏

聞請

旨事竊照古州屬黨堆寨逆苗不法一案

臣

等聞信于

五月十八日起程途次陸續接據護鎮程國相暨遊擊

官福具稟情形

臣

等籌調官兵緣由業于二十二日

恭摺奏

聞在案

臣

等是日自三脚塋上船至晚卽抵古州沿河

所過苗寨多有出岸迎接者

臣

等面加撫諭察看情形

俱極恭順二十三日早于舟次接據程國相稟稱前調

各營兵丁一千一百名內黎平朗洞上江三處兵丁共

八百名已于十九日到營連所帶鎮標兵六百名共一

千四百名除畱兵二百名在下江營北面高山安營防

守外伊于二十日領兵一千二百名同遊擊官福都司

占岱渡河分路前往進剿等語

臣

等于是日已刻抵下

江營又據程國相稟稱伊等于二十日上山攻剿烏牛

寨苗人俱已奔逃復至黨降黨界加柘三處亦無一苗

在寨當將四寨焚燒二十二日將黨堆及才烏嶺招分
招等寨攻圍亦俱早遁祇于山箐內搜獲苗人老兩等
五名解送理苗同知收審又有投誠苗人老髓等三名
情願隨營引路搜勦等語臣等查看下江形勢該營西
距古州九十里迤南一百八十里卽與粵西思恩縣接
界實爲古州鎮城下遊扼要之地駐劄遊擊守備各一
員千把總六員額兵五百餘名除分撥丙妹西山及各
塘汛兵丁外實在存城兵二百三十名該處祇築有土
牆一道並無城垣雉堞南門數十步瀕臨大河名爲都
江約寬三十丈許對岸卽起高山自山脚至山頂十里
林箐叢密其內名烏牛寨係苗人出入要路五月十三

日逆苗卽于此處下山由烏牛至黨界黨降加柘嶺招財烏分招畧里才瓦加的黨根諸寨相去或一二里或三四里至七八里不等黨堆寨實居其中總名滾塘一十二寨此外附近生熟各苗叅錯而居爲數甚多此下江營對河山內各苗寨之情形也臣等查逆苗各寨與下江營隔河相望且所居鱗次櫛比當五月十三日逆苗糾衆下山之時營中施放火炮打死數人旋俱退入山箐正當乘勝渡河奮力追捕何以株守河邊恐有畏葸觀望情事隨將在汛備弁嚴加詰詢據稱下江營四面皆屬苗寨方逆苗下山時城中現兵止二百三十名若全行渡河誠恐近地苗寨與逆苗陰相勾結是以不

敢擅離當經遊擊一面撥兵嚴行堵禦一面稟請調兵
勦捕等語察看形勢尙非虛捏臣等復查滾塘一十二
寨盡係熟苗向來尙俱安靜其因何起釁之處據同知
龔學海稟稱伊于本年三月到任風聞該寨苗民有倡
造邪說惑衆之事因令土舍土弁楊育麟楊昌永栗大
成廳差吳相歐成名等于五月初六日前往查訪詎初
十日俱被逆苗砍殺等語隨提護鎮等獲解苗人老兩
等嚴訊據供我是才烏寨苗上年十二月內聞得黨堆
寨苗香要會畫符水能吞銀鉄其同寨老勇與族弟老
九又有黨根寨女苗迫根俱學習其法各稱爲王將木
刻傳知各寨令人向他禮拜如不依從卽行殺害因此

人都畏懼本年五月初十日下午香要傳十二寨頭人到黨堆寨議話我也隨衆人到他寨內見香要頭纏青布身穿蟒服與迥根同坐中間老勇老九分坐兩邊香要吩咐說今有土舍廳差們來查事何不將這幾人殺死乘機起事彼時有他本寨寨頭老向勸阻他先把老向殺了是夜遂令衆人把楊育麟們五人一齊殺死的原約定十五日下午下山渡河搶奪下江營城得了糧草再作商議因恐怕官兵知覺先來故此于十三日糾集十二寨的苗人並邀約附近加額九申加慕黨紐晚彥加白加柯俛客佳居等生熟苗共二十一寨約千餘人各持鳥鎗標桿等器齊赴下江正欲渡河被官兵施砲打

死數人遂回烏牛寨屯札施放鎗砲虛張聲勢十五日
晚又暗領苗衆千餘人于下江之下二十里外拉窩寨
地方尋船欲潛行渡河因無船隻只得退回等語臣等
伏思克苗肆行不法旣糾約生熟苗二十一寨而此外
附近苗寨甚多誠恐被逆苗煽惑轉相勾結又恐聞大
兵經臨心懷疑懼別生事端隨刊刻通俗告示多張並
音出苗語發給附近一帶苗寨遍貼曉諭旣以安其疑
懼之心且以阻塞克苗逃竄之路現俱家諭戶曉有牽
牛羊攜酒食呈送者臣等却其所獻賞給銀牌好言撫
慰俱踴躍歡欣而去臣等查護鎮程國相雖獲得生口
十四人而所燒俱係空寨並無斬獲至二十日已燒毀

烏牛等寨二十一日始至黨堆甚屬延緩但兵已分進
難驟易將領且訊解到克苗老兩老成等僉供首逆香
要已逃入佳居寨竊計佳居係屬生苗若見官兵忽到
勢難抗拒將惡逆寄匿他寨輾轉勾結必致久羈時日
臣等公同商議須一面密遣妥人前往佳居諭令縛獻
首從諸逆並許免罪加賞以緩其謀卽或一時不肯遽
從亦必彼此猜嫌狐疑未定一面官兵猝然壓境自無
暇爲勾結之計隨訪有原充土舍萬忠人尙老實向爲
佳居附近諸寨苗人所信臣等傳喚前來卽于二十三
日晚令由永從縣小道而進計其到日我兵正當抵寨
復計程國相所統後隊兵僅二百名不敷策應二十四

日先于在城兵丁及貴東道標兵丁共挑選一百二十名派千總尹汝良帶往助用二十五日都江協原派兵丁三百名內到者一百八十名臣等計算正屬急應進發之期隨委大定協副將柴榮春統領前往與程國相協同進剿尅期于卽日必至佳居寨先斷該寨後路防其奔逸務使克苗一鼓就擒毋任遠颺致稽顯戮所有現在辦理情形理合據實

奏聞伏乞

皇上睿鑒訓示謹

奏

古州奏摺二

奏爲奏

聞事竊

臣

等前以官兵已抵生苗佳居地方一切情形

難以遙度必須親往察看會同提臣相機籌辦各緣由恭摺具

奏後

臣

等卽於閏五月初二日起程渡河過烏牛黨界

才烏領招黨堆諸寨俱已焚燒無存復歷未曾燒燬之黨根加的才瓦等寨苗民俱迎跪道旁牽羊獻酒口稱伊等俱未經從逆前因官兵焚燒黨堆等寨畏懼奔逃今見出示招諭陸續歸寨等語

臣

等以大兵已抵佳居

過滾塘十二寨更歷加慕九申黨紐加溜加額五寨之外諸寨苗人俱逃入山箐體察情形須籌辦佳居擒洗

首惡其餘自應分別查辦故於苗頭跪迎之時一一親
加撫綏諭令縛擒首從惡逆以表至誠羣苗俱歡喜唯
諾次日行至加湏寨前據護古州鎮程國相報稱五月
二十六日該寨前山有苗人放鎗拒捕我兵放鎗攻殺
賊苗俱各奔逃有該寨苗人自行放火將寨焚燒業將
放火苗人擒獲臣等查看該寨陡峻險絕直接加額實
爲佳居一帶生苗往來第一咽喉之地隨飭畱下江駐
守之署清江協副將朱永增於續到該協兵內截畱一
百名在此屯札以防要隘稽察苗人往來催趲文報是
日申刻臣等抵佳居寨該寨亦已焚燒提臣李國柱護
鎮程國相俱於該處結營上下相隔三里許南北兩處

各山頭俱設有卡房瞭望臣等查看形勢佳居對面南山名朋論大箐延袤四十餘里重山複嶺迤南卽與廣西恩恩等縣一帶獐苗地方相連西南與巖雞大箐緊接其箐更爲深大出口係黔省荔波營汛地方東北與湖南靖州接壤湖南廣西節經臣等知會一體提備荔波定且亦俱疊次密飭撥兵防禦在案統計下江過河自烏牛至佳居程途八十餘里步步皆山鳥道盤旋僅容一騎其險仄止可步行之處尤多今官兵已過險隘佳居知勢不可支盡行逃入朋論大箐臣等連日查訪並詢問擒獲生口僉稱黨堆香要固爲首惡而佳居實爲黨惡之尤五月十三日逆苗赴下江時佳居之苗全

數同往其鎗炮器械俱係佳居借與今復藏匿香要竄入深箐冀延殘喘實屬罪不容誅臣等公同商議諸惡困守窮箐必須搜洗惟是箐中路徑叢雜四面可通或逆苗哄誘旁寨緩則遠爲聲援急則前往藏匿必致久稽時日因訪得與各生苗熟識之人遣令四路招諭阻其勾結奔逸之路初四日卽有生苗俾各寨老雄等帶領該寨苗人赴營投誠並將寨內鎗刀鏢桿等械呈繳據稱該寨前經香要糾約實未依從隨行今情願訪查擒獻等語臣等察其情形似屬誠實當卽賞給銀牌紅布鹽烟等物諭以爾等苗寨俱以木刻爲信爾如實心願擒惡逆肯多約各寨爲搜箐鄉導可卽在此當面做

一木刻速行傳示該苗歡喜卽砍一木刻傳知生苗各寨協力擒獻約定日期來營回覆嗣後加榜寨頭人老廬寨那寨頭人老南岑項寨頭人老唐寨冒寨頭人老農堯灰寨頭人老鄒等來者俱一體曉諭去後又多差土弁把事人等帶領各寨苗頭分往各箐審晒逆苗踪跡來報初五日已刻據臣等前委大定協副將柴榮春稟據土弁苗頭將逆犯老勇訪拿解營當卽訊供辦理另摺恭

奏臣等覆查逆犯稱王者四人現在廵根老勇就擒已獲其二其首逆香要藏匿何山何箐之處雖據各犯供出尙未查明的確計一兩日內遣往招諭賄緝之各土

弁苗頭當有回信前調之撫標與鎮遠鎮標各官兵已陸續到齊現在偵察路徑尅期搜勦俟擒獲逆苗再行具

奏外所有臣等親至佳居籌辦情形並生苗俾各等投誠緣由理合恭摺奏

聞伏祈

皇上睿鑒訓示謹奏

古州奏摺三

奏爲奏

聞事竊臣等以逆苗香要竄入生苗佳居寨內程國相

領兵攻打該寨苗人俱逃匿無蹤查該寨切近朋論大
箐一面尅期發兵搜勦先遣各寨苗頭四路招撫曉諭
斷其勾結奔逸之路于初六日將情形恭摺具

奏卽于是日派令署鎮柴榮春候補叅將德光等帶領
官兵一千七百二十餘員名分三路將朋論大箐圍搜
初九日據柴榮春等回稱伊等查搜箐內見多餓斃苗
人及自縊身死者只獲佳居生口故兎及伊妻阿侯二
人解營候訊初十日復派柴榮春等帶領官兵一千五
百於朋論山迤東一帶山箐分路尋搜十一日據各該
將弁搜獲加額寨苗人老柯老控及黨紐寨苗人老往
並伊妻女等五名口十二日又派官兵一千四百餘名

令德光等分路在佳居西北之烏灰一帶山箐查搜三十
十四等日據各該將弁回稱箐內並無香要及佳居
民人搜獲加額寨苗人男婦老幼共九名口臣等訊明
無干將未經從逆各苗均交該寨頭人認識領回故免
老往二犯前後在營辦理歸于拿獲老九正法案內另
摺具

奏外臣等竊計佳居一寨一百八十餘戶男婦共七八
百人併零星分寨不下千人若共奔一處勢難容留今
附近山箐皆已窮搜絕無蹤影必分竄各生苗山內臣
等前遣俾吝如榜寨那岑項寨圓堯灰各頭人皆已陸續
回報稱附近各生熟苗寨俱經傳諭各寨頭人仰戴

皇上威德靡不感激領悟皆稱如香要投奔自當擒獻
並不敢容畱佳居之人_臣等慮遠處生苗或尙有未知
利害竊自容畱者復遣俾海寨頭人老千等前往加翁
加墨直至加葉一帶廣爲宣諭期以十日內回報_臣等
公同商議目下情形佳居已成窮蹙無依之勢大都餓
死深山卽有分藏生苗山箐者苗人見利忘義一兩月
內必自相猜嫌爭奪而死可以無需兵力但官兵撤後
恐其潛回舊穴見房宇焚燒田禾盡毀或與內地熟苗
報復指引夙嫌搶竊糧食又滋事端_臣等擬於拜發摺
後拔營回滾塘沿路搜尋山箐崩辦黨堆從逆之犯酌
畱古州鎮標兵四百名於佳居相去三四十里內黨紐

附近之地相度形勢屯扎控制間日巡查預絕佳居復
窺舊穴之計數月之後相機撤回再臣等連日審訊擒
獲生口已將黨堆要犯及旁寨助逆傷差各姓名暗記
預令各寨頭人傳諭無干之人各歸本寨安業如有仍
匿山箐者卽行誅戮數日以來俱已陸續回寨惟黨堆
烏牛黨降黨界四寨尙多觀望臣等於將到黨堆時暗
分兩路一由寨前一由寨後指名擒捕諒難他竄俟回
下江卽令所調官兵各歸本汛至香要尤爲要犯逐日
嚴密偵緝俟擒獲時卽行具

奏所有現在辦理情形及回兵日期理合恭摺具
奏伏祈

皇上睿鑒謹

奏

古州奏摺四

奏爲奏

聞事竊臣等於本月十七日自黨根寨回兵下江沿途將所有從逆及下手殺人兇犯逐一拿獲復遣黎平府知府王勲署清江協叅將朱永增帶領官兵三百餘名於分招嶺招一帶山箐內分爲數隊搜捕首逆香要及未獲兇犯業于二十四日將前後陸續拿獲人犯審明辦理情由

奏明在案

臣

等訪得香要從佳居逃後生苗各寨俱遵

奉

天朝法度不敢容留其犯法苗人逃竄至彼無敢賣與糧食者香要前往無路仍回滾塘相近山箐藏躲有已正法之逆苗老湯前往告知老勇老九迨根俱已被擒正法現有土舍頭人指引官兵數百前來搜捕首犯香要復連夜逃走隨路棄其妻子俱經拏獲最後獲其第三妻阿得獲時已潛服毒草未幾卽死尙有其攜帶前夫之女老乃可訊據供伊母與香要連日同藏各箐伊年小不知地名前日香要令伊同伊母至河邊摘粟充飢摘回時香要遂已不見等語臣等竊思大兵雖已撤回而王勲朱永增所領兵丁又續遣去官兵員弁共有

四百餘名現在山內逐日搜捕該犯聞風畏懼匿影愈
密恐蹤跡愈迷且臣等現駐下江各寨苗民間有未經
歸寨者而分招嶺招黨降黨界才烏等寨境內日有官
兵在彼相近山箐搜捕恐未能帖然安業倘疑復有進
剿之意各懷觀望轉致田地荒蕪將來苗民無以資生
亦非綏靖苗疆之計臣等悉心籌議檄飭王勲等將搜
山兵丁全行撤回一面徧行出示曉諭各寨使知安心
務農各歸本業明告以不復窮搜之意一面遵

布

皇上格外加恩懲惡勸善之至意使之各懷感激鼓舞

報効密選謹慎能事之士舍把事人等收換苗裝與之
協力不許張皇密行偵緝一有香要蹤線卽設法擒拏
臣等亦卽移駐古州揚言卽日回京使苗人等知大兵
不復進剿不致妄生疑阻至從前畱駐黨紐兵四百名
原以鎮遏佳居保護熟苗就近苗人俱悉知此意今仍
應暫行畱駐以防竄逸所有臣等現在辦理情形及移
駐古州緣由理合恭摺奏

聞再新任古州鎮總兵余大佐已于本月二十六日到
任合併聲明伏祈

皇上睿鑒謹

奏

古州奏摺五

奏爲拿獲逆苗首惡事竊照古州黨堆寨苗人香要與同寨老勇者九並黨根寨苗女迫根謀爲不法各自稱王經臣等前後拏獲老勇等犯俱已伏辜惟首逆香要狡黠異常輾轉竄匿未能卽獲嗣將該犯母妻子女全行拏到嚴加審訊亦不知藏匿定所因將搜箐官兵盡數掣出揚言不復追搜以懈其心隨選謹慎能事之士舍把事人等改換苗裝密行偵緝茲于六月初一日據貴東道魏涵暉稟據土舍歐韻清胡源稟稱滾塘十二寨苗頭蒙

皇上格外鴻恩得以復安生業又聞傳

旨賞賚出力苗人現在官兵掣出如獲更生俱懷感激
情願椎牛飲血誓必協擒香要以表感戴悔悟之忱
語臣等當卽傳諭獎許令其分路密拏隨于初二日分
駐古州初九日下晚據土舍歐韻清胡源將香要拏解
到案據稱各寨苗人連日協心訪拏有黨堆寨苗人老
响向伊告稱訪得香要在烏招山箐藏躲特來告知情
愿領路往拏伊等隨卽帶同把事並各寨苗頭老牙等
一十五人令老响引至烏招箐內該犯拔刀抵禦經把
事管顯王應田用棍打倒衆苗一齊動手細解前來等
語臣等當卽提犯會同研訊據香要供稱小苗今年三
十八歲是黨堆寨人妻老本生子老扣年六歲妾老釐

生女老醋年五歲又有二妾名阿得未有所生上年十二月裏曾哄衆苗說我得了法術能吞銀吃鉄鎗炮都不能傷苗人們信以爲實爭送銀錢又因小苗六七年曾在山中打過虎衆人都害怕因此益加畏服有本寨老勇老九並黨根寨女子迫根一同附從哄惑今年三月小苗因信的人多了心裏想做王遂與老勇老九迫根商量四人都稱起王來小苗爲大王老勇爲二王老九爲三王迫根爲四王傳人都來磕頭滾磨十二寨內有不信的小苗就揚言要殺是以懼怕都來那黨紐九申加額加溜等寨俱有來磕頭禮拜的人小苗想起佳居寨本係生苗又有鎗炮器械就親自到他寨內約

其幫助因與衆人期定五月十五日齊集攻搶下江營城又因烏牛寨與下江甚近其寨中諸人平日與小苗相好小苗因令其常到下江探聽信息初十日晌午知土舍粟大成領了土弁楊昌永楊育麟並廳差歐成名吳相及號書把事共有十幾箇人要到寨子來查問小苗見事情發覺一時起意就同老勇老九分途去傳了本寨的老印老叻並烏牛寨的老放老替等相與設計候楊昌永等進寨把住寨門衆人一齊擁進拏刀把楊昌永們亂砍共殺了十一箇人先有本寨苗人老向勸阻小苗也把他舉家殺了次日就分傳木刻到各寨約齊于十三日攻搶下江城如有不來卽將他抄殺因此

聚集千餘人于十三日下晚到烏牛十三日早一并下山行至河邊被官兵用炮打死數人又值大雨水發不得過河遂回到烏牛寨小苗同老勇商量十五日晚又率領衆人到拉窩寨想偷船過河因無船隻只得轉回在烏牛札住二十日官兵過河小苗們就各退回官兵連燒烏牛等寨小苗望見就帶了妻妾子女到黨紐寨住宿一夜次日到佳居二十六日官兵進來小苗與佳居人向前迎敵見官兵勢大各自逃散小苗從寨後翻山在烏灰山箐裏住過幾天原想遠赴生苗一帶地方潛藏又聽得有大人們差苗頭傳木刻到生苗寨不許容留小苗就折身走回藏在俾歐山內因官兵圍搜得

緊將妻老本妾老釀同子女都行衝散小苗欲移到烏
招山箐裏去因妾阿得帶有前夫子女恐漏消息因哄
其母女出山摘粟就獨自一人奔逃本月初八日有老
响來到箐裏哄小苗說如今各寨都出了招安告示勸
小苗改名回寨小苗不信正欲拔刀將他殺害忽有人
用棍把小苗打倒隨有十幾人一齊動手把小苗綑解
前來等語臣等查香要倡爲邪術哄誘愚苗輒敢恃其
強橫夥同老勇老九迫根等妄自稱王令衆人出錢禮
拜及聞土舍官差查訪肆行殺害復敢傳送木刻迫脅
各寨苗人謀搶下江實屬罪大惡極當將該犯綁赴市
曹臣等監視凌遲處死傳首下江及各寨示衆苗民觀

者無不稱快其該犯親屬除伊母阿保伊妻老本妾老
釀已經正法妾阿得于拏獲之時潛服毒草身死外伊
子老扣女老蜡二名口因畱爲識認暫行監禁今亦一
并正法訖查土舍歐韻清從前訪知香要潛蓄逆謀卽
首先赴下江報官又隨臣等在營前後將老勇老九二
犯率同苗人拏獲今復督率把事苗頭協擒首逆實爲
此案始終出力之人且該土舍年力精壯熟悉苗情仰
懇

皇上天恩賞給土把總之職令其彈壓稽查于苗疆殊
有裨益胡源係土把總胡朝舉之子跟隨在營每奉差
遣亦甚出力同把事管顯王應田及苗人老响等十五

人俱各從優獎賞訖統計此案首惡四人均已全獲其
從惡七人內尙有老替老蕪二名在逃已嚴飭土舍苗
人四路偵緝務期全獲再查勸阻香要殺害土弁等之
苗人老向其全家已爲香要殺害僅存其胞姪一人年
方六歲現在逃藏別寨俟查出後請將香要所遺田畝
賞給掌管所有拏獲首逆辦理緣由理合恭摺奏

聞伏乞

皇上睿鑒施行謹

奏

古州奏摺六

奏爲遵

旨查明具

奏事竊查苗疆重地良頑不一全在地方官平日撫輯有方稽查嚴密方足以馴獷悖而靖邊隅今黨堆寨逆苗香要等不法一案臣等擒獲生口研訊供情香要於上年十二月內卽假稱能吃銀鐵哄誘愚苗迨本年三月間遂糾夥老勇老九迨根等妄自稱王迨裔寨衆逞其狂悖潛期于五月十五日搶劫下江營城同知龔學海于上年十二月在省接印卽經委查丹江兵米一案于本年四月始行回任五月初間土舍歐韻清粟大成等風聞稟報龔學海卽派遣土弁楊育林等前往密查確信香要等見風聲已露卽糾同老兩老放等于初十

同將楊育林等十一人肆行殺害復恐官兵勦捕遂傳
送木刻糾衆千餘先期于十三日至下江對岸謀搶營
城龔學海聞楊昌永等被殺之信先至下江一帶收取
苗民船隻藏于北岸逆苗等欲泗水過河因炮斃數人
旋各退回十五日老勇等率衆復欲于拉窩倫渡亦以
無船而返旋經大兵過河進勦逆苗等遂各踉蹌敗散
此案龔學海雖失察於前而一經聞報卽差人訪查使
逆苗不法情狀得早敗露又能預收下江船隻俾逆苗
不得過河獨獺是龔學海辦理此案尙屬實力任事至
魏涵暉身爲道員在任三載本年二月兼攝黎平府事
平日不能稽查整頓致逆苗潛蓄奸謀漫無覺察實屬

庸碌無能應請

旨交部嚴加議處再查鳥鎗一項爲民間應禁軍器從前招撫各苗寨原令其盡繳器械方准投誠是就撫各苗寨所有私藏鳥鎗自應一體嚴禁今逆苗香要等糾衆不法謀搶下江臣等前在佳居據現獲生口俱供係向佳居借用今獲訊香要據供除佳居借用三十門外從逆熟苗亦間有攜帶者現據熟苗內如加慕黨紐及九申加溜加額等寨亦各呈繳鳥鎗三四門及一二門不等可見熟苗私藏鳥鎗並未嚴禁各寨內恐尙有未經呈繳者應令地方官一體查追所有失察之歷任古州鎮將及該地方官均應叅究容臣官兆麟查取職名

送部分別議處爲此恭摺奏

聞伏祈

皇上睿鑒施行謹

奏

請定苗疆運米例摺

奏爲請定苗疆運米之例以順苗情以清積弊以省浮費事查黔省撥運兵米每歲共一萬五千餘石動用腳價銀一萬二千餘兩內丹江一處平越府縣應運米二千六百餘石該運價口袋銀二千七百一十餘兩從前定例之時以該處俱係新撫苗民若干本地採買恐有滋擾是以於附近州縣採買運往給發乾隆三十四年

十月間經署丹江通判龔學海揭報部科稱平越府知府楊大鵬有私行折運之弊經部科叅奏奉

旨交

臣

等審訊

臣

等查出歷年俱係折交已將歷任各

官叅革治罪在案

臣

於審理時已略悉大概因查辦古

州匪苗親至都勻以及清江一帶畱心體訪本地苗民所種俱係稻田出米甚廣利于採買若欲實運則苗米既失賣米之利轉有輓運之勞是以折運一節官民俱屬相安徒將運價中蝕歷久不破

臣

查黔省步步皆山艱于輸輓運米一石與買價等是常以二石而致一石也若恐于苗民滋擾則自定例之初卽已私行折運並無嫌釁而據目擊情形則且以折運爲便似宜明定章

程令該地方官于秋收時將實在市價報明撫藩糧道
備案其應運之處酌中定價徵收折色解往當地採買
有餘則解司庫如有不足准予節省運價內開銷該管
上司不時查察如有抑勒短發之弊嚴叅治罪如此既
于蒞情甚便而官員永無明輸暗折之弊再臣聞通省
情形大略相同是每歲一萬二千餘兩之運價均屬虛
靡則不但查出私行折運之平越等處應改折運卽查
係歷年實運之處亦宜一體改折從前撫臣圖爾炳阿
奏請改折歲省運價七千九百餘兩尙屬不盡又未將
實在情形奏出是以經部飭駁不准臣因辦理此案確
賾情形理合據實陳奏是否有當伏乞

皇上聖明睿鑒

敕部議覆仍令該督撫悉心酌議施行謹

奏